

ODRŽAN TREĆI BIZNIS FORUM DIJASPORE

Treći biznis forum dijaspore „BHdiaFor 2015“ u organizaciji nevladine organizacije „Naša perspektiva“, održan je u petak, 9 oktobra pred oko 150 učesnika iz 20 zemalja.

Glavni zaključak skupa jeste potreba stimulisanja poslovne saradnje i investicija dijaspore Bosne i Hercegovine koju čine dva miliona raseljenika, što bi predstavljalo ogroman potencijal za razvoj BiH.

Studenti i nastavnici Panevropskog univerziteta „Apeiron“, koji je jedan od partnera Foruma, takođe su bili dio skupa koji je treći put za redom omogućio susret domaćih privrednika sa najuspješnijim privrednicima sa naših prostora koji trenutno borave van Bosne i Hercegovine.

- Tokom prošle godine oko 3,5 milijarde KM ušlo je iz inostranstva u našu zemlju, što je 13 posto učešća u BDP-u BiH. Procjenjuje se da je ovaj iznos i veći, jer se novac prenosi i putem neformalnih transfera koji nisu registrovani u platnom prometu, naglasio je prof. dr Sanel Jakupović, predsjednik grupacije „BhdiaFor“ i dekan Fakulteta poslovne ekonomije Univerziteta „Apeiron“. Dodao je i to da je prvi biznis forum održan u Prijedoru.



Guverner Centralne banke BiH, Senad Softić, na Forumu je naglasio da je zbog ušteda potrebno smanjiti troškove transfera novca iz inostranstva.

- Novac iz inostranstva vrlo nam je značajan. U nekim zemljama formiraju se fondovi kolektivnih doznaka od kojih se finansira pokretanje malog biznisa i vrše stalne edukacije dijaspore o finansiranju svoje zemlje, rekao je guverner Softić.

Katarina Vladić Lazić, direktorica COTRUGLI Business School, kazala je da ustanovu koju predstavlja i Panveropski univerzitet treba izdvojiti kada su u pitanju savremeni metodi prenosa znanja i tehnologija u regionu i jugoistočnoj Evropi. To je veoma značajno zbog naših ljudi van BiH koji donose Know How tehnologije.



Prof. dr Velibor Peulić, nastavnik Poslovne logistike i menadžmenta na Panevropskom univerzitetu, tokom panel diskusije rekao je da je „Apeiron“ hrabro i blagovremeno prilagodio silabuse, koji za rezultat imaju novi profil stručnjaka neophodnih savremenoj poslovnoj praksi.

- Za sve investitore „Apeiron“ je otvoren za saradnju u edukativnom i konsultantskom obliku, za nastup na domaćem i međunarodnom tržištu. Profili stručnjaka koji stiču diplome na Panevropskom univerzitetu predstavljaju garanciju uspješnom razvoju i unapređenju poslovanja kompanije, naglasio je profesor Peulić.